

दिनांक 09.10.2025

समय: 18.45 बजे

आकाशवाणी जयपुर-अजमेर

समाचार

- प्रधानमंत्री नरेन्द्र मोदी कह्यो—भारत अर ब्रिटेन स्वाभाविक साझेदार—लोकतंत्र, आज़ादी अर कानून रो राज दोन्यू देशां रा रिश्तां री बुनियाद।
- मुख्यमंत्री भजनलाल शर्मा प्रवासी राजस्थानियां ऊं राज्य मांय बत्तो ऊं बत्तो निवेश करण री अपील कीनी।
- मुख्य सचिव सुधांश पंत सगळा महकमा रा सचिवां ने जनता री समस्यावां रा बेगा निपटारा रा हुकम दीना।

अर

- निर्वाचन आयोग अंता विधानसभा हलका मांय व्हेवण वाळा उपचुनाव रे दौरान एआई आधारित वीडियो काम लेवण रा बारा मांय दिशा—निर्देश जारी कीना।

000

प्रधानमंत्री नरेन्द्र मोदी कह्यो है के भारत अर ब्रिटेन स्वाभाविक साझेदार है अर लोकतंत्र, आज़ादी अर कानून रो राज वां रा रिश्तां री बुनियाद है। वे आज मुंबई मांय ब्रिटेन रा प्रधानमंत्री कीर स्टारमर सागे भेळी प्रेस वार्ता मांय बोल रह्या हा। श्री मोदी कह्यो के दोन्यू देश दुनिया री थरता अर माली बरकत करणो तैय कीनो है। प्रधानमंत्री मोदी भारत मांय ब्रिटेन रा नौ विश्वविद्यालयां रा परिसर बेगा ई खुलण परां खुशी जताई।

ब्रिटेन रा प्रधानमंत्री कीर स्टारमर भारत—ब्रिटेन व्यापक आर्थिक अर व्यापार समझौता ने ऐतिहासिक पल बताता थकां कह्यो के शुल्क कम व्हेवण ऊं एक—दूजा रा बाज़ारां तांई पहुंच बधावण ऊं दोन्यू देशां मांय विकास बधेला, जिन्दगी बेहतर बणेला अर नौकरी—धंधा रा मौका मिलेला। साल 2047 तांई विकसित भारत रा नज़रिया अर कोशिशां सारु प्रधानमंत्री मोदी ने शुभकामनावां देता थकां स्टारमर कह्यो के भारत वां रा मिशन ने सांचो करण सारु सही गेला माथे चाल रह्यो है अर ब्रिटेन ई वां री ई यात्रा मांय भागीदार बणबा री मंशा राखे है।

000

मुख्यमंत्री भजनलाल शर्मा कह्यो है के वां रा राज मांय महिलावां ने ध्यान राखता थकां खास योजनावां चलायी जा रही है, ताकि वे हर हलका मांय आगे बध र प्रदेश रा माली विकास मांय खास योगदान कर सके। वे कह्यो के मुख्यमंत्री रसोई गैस सब्सिडी योजना

रा तैत महिलावां ने साढे चार सौ रुपया मांय रसोई गैस री टंकी दी जा रही है, 1 करोड़ 22 लाख महिलावां ने मुफ्त सैनिटरी नेपकिन दिया ज्या है अर भणार्इ-लिखार्इ ने बधावो देवण सारू 39 हजार ऊं बत्ती स्कूटियां दीरीजी है। ई रे अलावा, 'लाडो प्रोत्साहन योजना' रा तैत टाबरियां ने जन्म परां डोढ़ लाख रुपया रो बचत बॉन्ड दियो जा रह्यो है। सरकार 181 महिला हेल्पलाइन अर कालिका पेट्रोलिंग यूनिट बणा र महिलावां री हिफाजत ने मजबूत बणायी है।

000

मुख्यमंत्री भजन लाल शर्मा प्रवासी राजस्थानियां ने राज्य रा निवेश सारू चोखा माहौल रो फायदो उठाता थकां बत्तो ऊं बत्तो निवेश करण री अपील कीनी है। श्री शर्मा आज वां रा रेहवास माथे महाराष्ट्र ऊं आया '**राजस्थान प्रकोष्ठ**' रा नुमाइंदां सागे मुलाकात रे दौरान बोल रह्या हा। ई दौरान राजस्थान अर महाराष्ट्र बीचे सामाजिक अर माली लेन-देन कार्यक्रम रा बारा मांय चर्चा करीजी। मुख्यमंत्री कह्यो के राजस्थान मांय सूरज री रोशनी ऊं बणबा वाळी बिजली, खनिज संपदा अर जरूरी तादाद मांय बिजली-पानी मौजूद है। श्री शर्मा निवेशकां ने राज्य सरकार कानी ऊं हर संभव मदद रो भरोसो दिरायो। वे प्रतिनिधिमंडल ने 10 दिसंबर ने व्हेवण वाळा '**प्रवासी राजस्थानी दिवस**' कार्यक्रम मांय शामिल व्हेवण सारू ई न्यौतो दीनो।

000

भारतीय जनता पार्टी रा प्रदेशाध्यक्ष मदन राठौड़ कह्यो है के लारला 10 साल मांय महंगाई री रेट 9 दशमलव 8 ऊं घट र 1 दशमलव 9 फीसदी रह ग्यी है। वे कह्यो के जीएसटी सुधार लागू व्ह्या पाछे जनता ने हर चीज मांय फायदो मिल रह्यो है अर रोज काम आवण वाळी चीजां सस्ती व्ही है। श्री राठौड़ आज पाली मांय वां रा रेहवास माथे खबरनवीसां सागे बातचीत कर रह्या हा। वे काश्तकारां ऊं जैविक खेती अर ड्रोन काम लेवण री अपील कीनी।

000

प्रधानमंत्री नरेंद्र मोदी रो थावर ने नई दिल्ली मांय **प्रधानमंत्री धन धान्य कृषि योजना** अर दलहन हलका मांय खुद रे पाण ऊबा व्हेवण रा मिशन री सरूआत रो कार्यक्रम है। कृषि अर किसान कल्याण मंत्री शिवराज सिंह चौहान आज नई दिल्ली मांय खबरनवीसां ने आ जाणकारी दीनी। वे कह्यो के देश गेहूं अर धान री उपज लेवण मांय खुद रे पाण ऊबो व्हे ग्यो है अर आवता बगत मांय दलहन री उपज मांय ई आत्मनिर्भर बण जावेला। वे कह्यो के प्रधानमंत्री धन धान्य कृषि योजना रो मकसद उत्पादकता बधावणो अर पाणत अर भंडारण मांय सुधार करणो है।

000

लय मांय कमेटी ऑफ़ सेक्रेटरीज री मीटिंग लीनी। वे अहलकारां ने लोक सेवक व्हेवण रे नाते जनता ऊं आसानी ऊं मिलण अर वां री परेशानियां सुण र वां ने बेगी ऊं बेगी दूर करण रा हुकम दीना। श्री पंत अहलकारां ने वां रे मातहत दफतरां रो औचक दौरा करण अर केंद्र अर राज्य री योजनावां रो फायदो पात्र लोगां ताई पूगावण बाबत् कह्यो।

000

निर्वाचन आयोग अंता विधानसभा उपचुनाव-2025 समेत दूजा चुनाव ने ध्यान राखता थकां सियासी पार्टियां ने आर्टिफिशियल इंटेलिजेंस-ए.आई. आधारित वीडियो काम लेवण परां

करड़ा दिशा-निर्देश जारी कीना है। आयोग गलत सूचना या भ्रम पैदा करण वाळा वीडियो माथे गंभीर चिंता जताई है। प्रदेश रा मुख्य निर्वाचन अधिकारी नवीन महाजन बतायो के प्रचार सामग्री मांय ए.आई. तकनीक या डिजिटल बदलाव रो इस्तेमाल करण री सूरत मांय वां माथे साफ तौर ऊं **“आर्टिफिशियल इंटेलिजेंस आधारित”** मांडणो ज़रूरी व्हेला।

000

स्वास्थ्य अर परिवार कल्याण राज्यमंत्री अनुप्रिया पटेल आज नई दिल्ली मांय तंबाकू मुक्त युवा अभियान रा तीजा दौर री सरुआत कीनी। आखा देश मांय साठ दिन ताई चालण वाळा ई अभियान रो मकसद बच्चां अर नौजवानां ने तम्बाकू काम लेवण ऊं बचावण, इण ने काम लेवणो छोड़बा री मर्जी राखण वाळां ने बधावो देवणो अर स्कूल-कॉलेजां मांय स्वास्थ्य अर कल्याण री मज़बूत संस्कृति ने बधावो देवण सारु शिक्षित अर मज़बूत बणावणो है। ई मौके सुश्री पटेल देश रा नौजवानां रा मोटो हिस्सा रे तंबाकू री लत लाग जावण परां चिन्ता जतायी।

कार्यक्रम रे दौरान मंत्री अनुप्रिया पटेल विद्यार्थियां ने **‘तंबाकू को ना कहें’** री शपथ ई दिरायी।

000

राज्य मांय चलाया जा रह्या **‘शुद्ध आहार मिलावट पर वार’** अभियान रा तैत जयपुर मांय जगतपुरा रेलवे फाटक कने एक पिकअप ऊं करीब साढे तीन सौ किलोग्राम सिंथेटिक पनीर पकड़ी ज्यो। अहलकारां रे मुजब ओ पनीर, पाउडर अर पाम ऑयल ऊं बणायी ज्यो हो जिण ने ढाबां अर दुकानां माथे भेज्यो जावणो हो।

000

झुंझुनूं मांय दीवाळी रे मौके महिला अधिकारिता विभाग अर राजीविका री मदद ऊं 10 दिन री **अमृता हाट ए फैमिली फेयर** आज सरु व्ह्यो। ज़िला कलेक्टर डॉ. अरुण गर्ग अर एस.पी. बृजेश ज्योति उपाध्याय मेळा रो उद्घाटन कीनो। इण मांय राजस्थान, पंजाब, गुजरात, अर महाराष्ट्र रा हाथ री कारीगरी ऊं बणायी ज्या सामान माथे लोगां रो खास ध्यान जा रह्यो है। 18 अक्टूबर ताई चालण वाळा ई मेळा मांय रोजीना सिंज्यां री पोर सांस्कृतिक कार्यक्रम राख्या जावेला। जिला कलेक्टर डॉक्टर अरुण गर्ग बतायो के अमृता हाट रे मार्फत महिलावां कानी ऊं चलाया जा रह्या सेल्फ हेल्प ग्रुप मज़बूत बणे है।

000

स्वायत्त शासन अर नगरीय विकास राज्यमंत्री झाबर सिंह खर्चा कह्यो है के राज्य सरकार जनता री समस्यावां तुरत निपटावण अर वां ने न्यारी-न्यारी योजनावां रो फायदो दिरावणो तैय कीनो है। मंत्री खर्चा आज भरतपुर मांय राख्यी ज्या शहरी सेवा शिविर मांय बोल रह्या हा। ई मौके वे अढाई सौ आवासीय पट्टा अर न्यारी-न्यारी योजनावां रा तैत मंजूरी रा कागजात दीना।

000

ब्यावर ज़िला री अतितमंड ग्राम पंचायत मांय लगायी ज्या ग्रामीण सेवा शिविर रो उपखंड अधिकारी दिव्यांश सिंह दौरो कीनो। वे न्यारा-न्यारा महकमां कानी ऊं लगायी ज्यी स्टॉलां देखी अर गांव वाळां ऊं बातचीत कर र वां री परेशानियां री जाणकारी लीनी। शिविर मांय पात्र लोगां ने आवासीय पट्टा दिया ज्या अर किसानां ने कृषि किट बांटी ज्या।

000

भीलवाड़ा अर श्रीगंगानगर ज़िलां मांय आज व्ह्या सड़क हादसां मांय तीन जणां री मौत व्हे गयी अर केई लोग ज़ख्मी व्हे गया। भीलवाड़ा ज़िला मांय आसींद कने ट्रक अर कार री टक्कर मांय लोग-लुगाई रा एक जोड़ा री मौके ई मौत व्हे गयी, जद के वां रा पिरवार रा तीन जणा जख्मी व्हे गया, ज्यां ने अस्पताल मांय भर्ती करायी ज्या है। श्रीगंगानगर ज़िला रा सूरतगढ़ मांय एन.एच-62 माथे मोकलसर बस स्टैंड कने पिकअप गाड़ी रे ट्रौला री फेंट मांय आ जावण ऊं एक जणा री मौत व्हे गयी अर दो जणा घणा जख्मी व्हे गया।

000

जयपुर रा जिला कलेक्टर डॉ. जितेंद्र कुमार सोनी गिदानी कने काल व्ह्या सड़क हादसा रा कारणों री गहराई ऊं जाँच करावण अर आइंदा ऐड़ा हादसा रोकण सारू सुझाव देवण बाबत जांच समिति बणायी है। अतिरिक्त जिला कलेक्टर री सदरत मांय बणायी ज्यी आ समिति मौका मुआयनो कर र संबंधित जाणकारी हासिल करेला। समिति ने गैस, डीजल अर सरीखा रासायनिक पदार्थ हिफाजत सागे ले जावण अर संभावित आगजनी री रोकथाम रा उपायां माथे ई राय देवण सारू कही ज्यो है।

000